

ETA. Iñaki Lizundia presoak abokatuari esan dio jendarmeek egin zutela tiro lehenik, eta bederatzi tiro izan zirela

Jendarmeen zauritzeak «gogoz kontrakoak» izan direla dio ETAk

Enfrentamenduen iturburuan jendarmeek etakideen aurka egin izana dagoela adierazi du erakunde armatuak oharrean

Erredakzioa | **DONOSTIA**

Azken asteetan ETako kideen eta Frantziako jendarmeen artean izaniko enfrentamenduak jendarmeek eragindakoak izan direla adierazi du erakunde armatuak EGUNKARIARI helarazitako prentsa oharrean. Honela dio hitzez hitz oharra:

«Azken egunotan Euskal Herrikan kanpo Frantziako jendarme eta ETaren gudarien artean izandako enfrentamenduen inguruan honakoa adierazi nahi dugu:

1.- Enfrentamendu horien iturburuan Euskal Herria militarki zanpatu eta bere eskubide demokratikoak ukatzen dituen Frantziako Errepublikako jendarmeek gure kideen aurka jo izana dagoela, eta inolaz ere ez alderantziz.

2.- ETaren gogoz kontrakoak izan direla zaurituak eta euskal

herritarren bahiketak eragin dituzten ustekabeko enfrentamendu horiek».

Lizundiaren bertsioa

Hain zuzen, Koordinaketak atzo azken tiroketan zaurituta Iñaki Lizundia presoaren bertsioa eman zuen. Lizundia Auchen atxilotu zuten abenduaren 6an, eta tiroz zauritu. Koordinaketak dioenez, bertsio hori «Poliziaren bertsioari erabat kontrajartzen» zaio. Auchen atxilotutako hiru pertsonen abokatuak Lizundiak jendarmeen bertsioa erabat gezurtatzen duela jakinarazi zuen eta. Iñaki Lizundiaren arabera, «jendarmeek bederatzi tiro» egin zituzten, hari buruz. Bala haietatik batek ETako ustezko kidea besoan zauritu zuen.

«Iñakik, bere aldetik, lau bala tiratu zituen zakurrari buruz, koska egiteko hurbildu zitzaio-

larik. Baina ez zuen jendarmeei buruz tiro egin», zehaztu zuen Koordinaketak. Lizundiak epai-leari ere kontatu zion bere bertsioa. Jendarmeek, ordea, Iñaki Lizundia zela haiei buruz tiroka hasi salatu zuten.

«Jendarmeek bertsio ofizial bat garatu dute, erabat alderantzizkoa eta helburu bakarra daukana, Iñaki Lizundia nahitarako hilketa saiakerarako kondenatzea eta, iritzi publikoari begira, holako borroka bat euskal militante baten kaltetan itzul litekeela justifikatzea», Koordinaketaren ustez.

Auchekoa azken asteetako hirugarren tiroketa zen. Lehenbizikoa Sauvagnonen gertatu zen (Pauetik hurbil), azaroaren 17an, jendarmeen kontrol batek ihes egitean. Jendarme bat zauritu zen, baina zauri nahiko arinekin. Bigarren tiroketa azaroaren 28an gertatu zen Muneinen, Pauetik hurbil. Ustezko bi etakide bide bazterrean zeudela, bi jendarme kontrolatzera hurbildu ziren. Kontrola denboran tiroketa hasi zen, eta Gerard Larroude jendarmea oso larri eraman zuten ospitalera.



LIONEL BONAVENTURE / EPA
Iñaki Lizundia, zauritua eta atxilotua, jendarmeekin.

ETako ustezko lau kide atxilotu ditu poliziak, Auch herriko bizileku batean


Erredakzioa | **BAIONA-DONOSTIA**

Frantziako Polizia Judizialak ETako ustezko lau kide atxilotu zituen atzo arratsaldean, Auch herrian (Tolosatik 80 bat kilometrotan). Atxilotuak Juan Ramon Karasatorre Aldaz Zapata, Jose Ramon Lete Alberdi, Lorentxa Beyrie eta Aintzane de Orcolaga Etxaniz direla zabaldu zuten polizia iturriek. Koordinaketak EGUNKARIARI adierazi zionez, izenak ez zituzten oraino baieztatuak. Lau pertsonak poliziak lehenagotik bilatzen zituelako solasa zabaldu zuten berri agentziek.

Atxilotoketa arratsaldeko 15:50ean gertatu zen, lau pertsonak Aucheko bizileku batek ateratzen ari zirela. Poliziak

etxe hori duela zenbait egun zaintzen zuen, Aucheko azken atxilotketen ondotik bildu informazioen ondotik. Abenduaren 6an hiru lagun atxilotu zituzten kontrol batean. Lau atxilotuek ez zutela erresistentziarik egin zehaztu zuten polizia iturriek. Auchen zuten bizilekua uztekoan zirela jakinarazi zuten. Poliziak etxe hartan armak aurkitu zituen.

Karastorreri Donostia komandoan parte hartu izana leporatzen diote. Bertzeak bertze, Gregorio Ordoñezen kontrako atentatua, Mariano de Juana Santamariaren kontrako, eta Enrique Nietoren hilketa leporatzen dizkiote. Hiru atentatuak 1995ean gertatu ziren. Lete Alberdiri, aldiz, erre-



EPA
Jose Ramon Lete (ezkerrean) eta Juan Ramon Karasatorre.



gearen kontrako atentatu entseguan parte hartzea egotzi diote. Atentatu entsegu hori 1995eko agorrilean izan zen.

Mariano Raxoi, pozik

Mariano Raxoi Espainiako Barne ministroak Frantziako eta Espainiako segurtasun indarren elkarlanaren barruan kokatu zituen atzoko atxilo-

tak. Elkarlan horren emaitzatik pozik agertu zen Raxoi, «azken hiru hauek kontuan hartuta uda amaieratik ETako 17 kide atxilotu dituzte Frantziaren», adierazi zuen, eta egini-ko atxilotetak, gainera, garrantzitsuak izan direla adierazi zuen.

Atzoko polizi operazioa «garrantzi handikoa» izan zela eta

ETarentzat «kolpe handia» dela adierazi zuen. Atxilotuak ETaren aparatu logistikoan kokatu zituen. Konkretuki, duela bost bat urtetik, etakide berriei formakuntza eta ikastaroak ematen zizkietela adierazi zuen. Atzoko operazioari buruz datu gehiegirik ez zuen eman. Jose Ramon Leteren aurka Auzitegi Nazionalen bost bilatze eta atxilotze agindu daudela esan zuen, eta nazioarteko aginduak, berriz, hiru. Karasatorreraren kontra Auzitegi Nazionalen zortzi agindu daudela adierazi zuen, eta nazioartekoak, berriz, sei.

Raxoik Frantziako Polizia Judiziala eta Espainiako Segurtasun Indarrak zoriondu zituen. «Frantziaren laguntza gero eta eraginkorragoa da. Akordioak lortzeko garaian dagoen laguntza ere areagotzen ari da, eta adibide gisa hor dago aldi baterako entregin inguruan hartutako erabakia», adierazi zuen.